



Broj/Број: 01/7-50-1-7-2-41/06
Sarajevo/Сарајево: 31.10.2006.

PRIMLJENO: 29. 11. 2006			
Organizaciona jedinica	Klasifikaciona oznaka	Redni broj	Broj priloga

B

ZAPISNIK

41. sjednice Administrativne komisije Predstavničkog doma
Parlamentarne skupštine Bosne i Hercegovine,
održane u zgradi institucija BiH 31.10.2006. godine, s početkom u 11.10 sati

PRISUTNI ČLANOVI KOMISIJE: Senija Kapetanović, Vinko Zorić, Ruža Sopta, Hazim Felić, Mubera Ušanović, Dušanka Majkić, Mladen Potočnik, Momčilo Novaković i Jozo Križanović.

OSTALI PRISUTNI: Aljoša Čampara, sekretar Zajedničke službe Sekretarijata Parlamentarne skupštine BiH; Branka Todorović, sekretar Predstavničkog doma Parlamentarne skupštine BiH; Jadranka Korać, šef Odjela za računovodstvo i finansije u Zajedničkoj službi Sekretarijata Parlamentarne skupštine BiH, Isanović Edin, volonter u Istraživačkom centru Parlamentarne skupštine BiH, Alma Tajić, privremeni stručni saradnik sekretara Administrativne komisije, i Stiv Li iz OSCE-a s prevodiocem, koji se pridružio u toku AD.3.

41.sjednicom Administrativne komisije Predstavničkog doma Parlamentarne skupštine BiH predsjedavala je Senija Kapetanović, predsjedavajuća Administrativne komisije Predstavničkog doma Parlamentarne skupštine BiH.

Za sjednicu je predložen sljedeći

DNEVNI RED

1. Usvajanje Zapisnika 40. sjednice Administrativne komisije;
2. Razmatranje devetomjesečnog finansijskog izvještaja za period od 1.1.do 30.9.2006.;
3. Razmatranje zahtjeva poslanika za dodjelu novčane pomoći zbog teže bolesti;
4. Informacija o zahtjevima poslanika za naknadu plaće po prestanku mandata;
5. Prijedlog za utvrđivanje visine naknade za privremeno obavljanje poslova;
6. Razmatranje Nacrta izvještaja o radu Administrativne komisije za mandatni period 2002.-2006.;

7. Informacija o odlukama Visokog sudskog i tužilačkog vijeća BiH, broj: VSTV-08-1144-21092006, od 21.9.2006. i VSTV-08-1155-25092006, od 25.9.2006.;
8. Tekuća pitanja:
- a) Informacija o Tumačenju Tačke IV. Odluke o utvrđivanju naknade za rad u Ad hoc komisiji za izbor i imenovanje, broj: 01/7-50-1-52-4-32/05, od 21.12.2005.

41. sjednicu Administrativne komisije Predstavničkog doma Parlamentarne skupštine BiH otvorila je predsjedavajuća sjednicom Senija Kapetanović, koja je predložila dnevni red i dopunu dnevnog reda pod tačkom Ad-8. i to:

- b) Informacija o potvrđivanju na domovima Pravilnika o međunarodnim aktivnostima Parlamentarne skupštine Bosne i Hercegovine, broj: 01/7,02/3-50-1-17-4-20/06, od 26.7.2006.;
- c) Verifikacija prečišćenog teksta Pravilnika o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, broj: 01/7,02-/03-50-1-188-6-9/05, od 25.5.2006.,

te pozvala prisutne članove Administrativne komisije da se izjasne o njemu, odnosno da daju svoje primjedbe, prijedloge i sugestije.

S obzirom da nije bilo primjedbi i prijedloga, prisutni su jednoglasno usvojili dnevni red s predloženom dopunom tačke Ad-8., te pristupili njegovom razmatranju po utvrđenim tačkama.

AD-1 Prisutni su jednoglasno, bez primjedbi, usvojili Zapisnik 40. sjednice Administrativne komisije Predstavničkog doma Parlamentarne skupštine BiH.

AD-2 Uvodno izlaganje o ovoj tački dnevnog reda dala je Senija Kapetanović, te pozvala Jadranku Korać, šefa Odjela za računovodstvo i finansije, da da dodatno obrazloženje devetomjesečnog finansijskog izvještaja za period od 1.1.do 30.9.2006. Nakon obrazloženja izvještaja, prisutni su jednoglasno usvojili

ZAKLJUČAK

Prima se k znanju Izvještaj o izvršenju budžeta za period od 1.1.do 30.9.2006.

AD-3 Predsjedavajuća Komisije Senija Kapetanović upoznala je prisutne sa zahtjevima poslanika: Fatime Leho, Ljiljane Milićević, Vinka Zorića, Muhameda Altića i Muhameda Moranjkica za dodjelu novčane pomoći zbog teške bolesti. U svom uvodnom izlaganju posebno je istakla da je sva potrebna dokumentacija, zajedno s mišljenjem Fonda za penzijsko i invalidsko osiguranje Republike Srpske, Odjeljenje za ocjenu radne sposobnosti u I. stepenu, kao i mišljenjem Instituta za medicinsko vještačenje u oblasti penzijskog i invalidskog osiguranja Sarajevo, Odjeljenje za ocjenjivanje radne sposobnosti u prvom stepenu, dostavljena članovima Komisije.

Hazim Felić istakao je da je sva dokumentacija u dostavljenim materijalima za sjednicu kompletna, te da zato nema potrebe da se o ovoj tački dnevnog reda raspravlja.

Momčilo Novaković predložio je da se o svakom zahtjevu glasa pojedinačno, što su članovi Komisije prihvatili.

Prisutni članovi Komisije jednoglasno su donijeli

ODLUKU
o dodjeli novčane pomoći

I.

Poslaniku Fatimi Leho, zbog teške invalidnosti, dodjeljuje se novčana pomoć u iznosu od tri mjesečne plaće isplaćene u prethodna tri mjeseca.

II.

Za realizaciju ove odluke zadužuje se Kolegij Sekretarijata Parlamentarne skupštine Bosne i Hercegovine.

III.

Odluka stupa na snagu danom donošenja

Prisutni članovi Komisije jednoglasno su donijeli

ODLUKU
o dodjeli novčane pomoći

I.

Poslaniku Ljiljani Milićević, zbog teške bolesti, dodjeljuje se novčana pomoć u iznosu od tri mjesečne plaće isplaćene u prethodna tri mjeseca.

II.

Za realizaciju ove odluke zadužuje se Kolegij Sekretarijata Parlamentarne skupštine Bosne i Hercegovine.

III.

Odluka stupa na snagu danom donošenja.

Prisutni članovi Komisije jednoglasno su donijeli

ODLUKU
o dodjeli novčane pomoći

I.

Poslaniku Vinku Zoriću, zbog teške bolesti, dodjeljuje se novčana pomoć u iznosu od tri mjesečne plaće isplaćene u prethodna tri mjeseca.

II.

Za realizaciju ove odluke zadužuje se Kolegij Sekretarijata Parlamentarne skupštine Bosne i Hercegovine.

III.

Odluka stupa na snagu danom donošenja

Prisutni članovi Komisije jednoglasno su donijeli

ODLUKU

o dodjeli novčane pomoći

I.

Poslaniku Muhamedu Altiću, zbog teške bolesti člana njegove uže porodice, dodjeljuje se novčana pomoć u iznosu od tri mjesečne plaće isplaćene u prethodna tri mjeseca.

II.

Za realizaciju ove odluke zadužuje se Kolegij Sekretarijata Parlamentarne skupštine Bosne i Hercegovine.

III.

Odluka stupa na snagu danom donošenja.

Prisutni članovi Komisije jednoglasno su donijeli

ODLUKU

Poslaniku Muhamedu Moranjkiju ne odobrava se novčana naknada predviđena za slučaj teške bolesti poslanika ili člana njegove uže porodice kako je to utvrđeno tačkom XXII. Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.6.2006.

AD-4 Uvodno izlaganje o ovoj tački dnevnog reda dala je Senija Kapetanović.

Dodatno obrazloženje uz ovu tačku dnevnog reda dao je sekretar Zajedničke službe Sekretarijata Parlamentarne skupštine BiH Aljoša Čampara. Obrazložio je prijedlog Odluke o ostvarivanju prava poslanika po prestanku mandata i naglasio da se ova odluka odnosi isključivo na poslanike u Predstavničkom domu Parlamentarne skupštine BiH, a da je, u skladu s Odlukom o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.6.2006., Administrativna komisija Predstavničkog doma Parlamentarne skupštine BiH nadležna za donošenje pojedinačnih rješenja za svakog poslanika. Nadalje je istakao da je, u skladu s Prijedlogom odluke, 19 poslanika dostavilo potvrdu da se ne

mogu vratiti na posao kod ranijeg poslodavca čime su stekli pravo na naknadu plaće u trajanju od 12 mjeseci, od dana prestanka mandata. Četiri poslanika umirila su radni odnos kod ranijeg poslodavca i oni neće moći ostvarivati pravo na naknadu, dok su dva poslanika izabrana u Parlament Federacije BiH. Istovremeno je upoznao članove Komisije da mandat poslanicima traje do prve konstituirajuće sjednice novog saziva Parlamentarne skupštine BiH.

Davorka Čaplinski obrazložila je zašto se na listi nalazi Mehmed Žilić, koji je izabran u Parlament Federacije BiH.

Hazim Felić podsjetio je prisutne na iskustvo iz ranijeg perioda kada su u sličnoj situaciji bili Mirsad Ćeman i Seada Palavrić koji su iz Parlamenta Federacije BiH bili izabrani u Parlamentarnu skupštinu BiH i da je upravo ovakva situacija pokrivena predloženom odlukom.

Aljoša Čampara naglasio je da se Sekretarijat Parlamentarne skupštine BiH nalazi u teškoj situaciji u pogledu rješavanja pojedinačnih slučajeva, pri čemu je naveo primjer Fatime Leho, koja tek u januaru 2007. stiće uslove za punu penziju, te da Administrativna komisija Predstavničkog doma, kao nadležna komisija, treba da donese pravične odluke.

Senija Kapetanović naglasila je da su moguće promjene prijedloga odluke ako se uzmu u obzir situacije koje mogu nastati i koje se ne mogu trenutno predvidjeti. Pozvala je prisutne da usvoje Prijedlog odluke za pobrojane poslanike za koje je već izvjesno da im je riješen status, a da se, ako bude potrebno, naknadnim izmjenama odluka doraduje.

Momčilo Novaković pitao je prisutne da li su poslanici koji su umirili radni odnos kod ranijeg poslodavca upoznati s tim da treba da donesu dokument da će se vratiti na posao kod ranijeg poslodavca, te da na osnovu toga pravo na naknadu plaće ne mogu koristiti.

Davorka Čaplinski informirala je prisutne da je svim poslanicima poslano obavještenje da Sekretarijatu Parlamentarne skupštine BiH dostave potvrde o svom radnom statusu, te je obrazložila stav 2. tačke XXV. Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.6.2006.

Senija Kapetanović saopćila je prisutnima da su svi poslanici upoznati s posljedicama dostavljanja, odnosno nedostavljanja potvrda.

Jozo Križanović istakao je da postoji Odluka o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.6.2006., koje se Administrativna komisija treba pridržavati i u skladu s njom svaki slučaj pojedinačno rješavati. Iz navedenih razloga smatra nepotrebnim da se na današnjoj sjednici ovo pitanje rješava i donosi odluka. Naglasio je da on prihvata ovu tačku dnevnog reda kao informaciju, a ne kao rješavanje pitanja prava na naknadu plaće poslanika. Upitao je da li su se poslanici pojedinačno izjašnjavali o svom radnom statusu.

Hazim Felić naglasio je da se svaki poslanik pojedinačno izjasnio o navedenom pravu.

Aljoša Čampara odgovorio je na pitanje Joze Križanovića i naglasio da su se svi poslanici pojedinačno izjasnili, što je dostavljeno i u prilogima za sjednicu, a da će se u skladu s navedenom odlukom raditi pojedinačna rješenja.

Jozo Križanović ponovo je insistirao da se s usvajanjem odluke treba još sačekati, kako bi se spriječila eventualna mogućnost da se nekom poslaniku uskrati pravo koje mu prema navedenoj odluci pripada.

Vinko Zorić istakao je da se ne smije povrijediti pravo nijednog poslanika. Naveo je da su se poslanici Mehmed Žilić i Muhamed Moranjkić izjasnili, ali da smatra da, ako poslaniku odgovara više ovo pravo, onda treba imati mogućnost i da bira da li će se profesionalizirati u Parlamentu Federacije BiH ili će ostvarivati pravo na naknadu u trajanju od 12 mjeseci u Parlamentarnoj skupštini BiH. S tim u vezi Davorka Čaplinski navela je da će se ovi i slični slučajevi rješavati u skladu s članom 3. Prijedloga odluke.

Hazim Felić upoznao je prisutne s problemom Nadžide Mlaćo, koja nije mogla dobiti potvrdu o svom radnom statusu od ranijeg poslodavca, zato što Veterinarska stanica u Bugojnu, u kojoj je radila, više ne funkcioniše, pa smatra da bi njen status trebalo adekvatno riješiti, odnosno da i u tom slučaju donijeti pravednu odluku.

Ruža Sopta izrazila je sumnju da li će Mehmed Žilić biti u sukubu interesa ako bude poslanik u Parlamentu Federacije BiH i ako istovremeno bude koristio pravo na naknadu u Parlamentarnoj skupštini BiH. Također, iznijela je svoje protivljenje uvođenju termina tehnički mandat u odluci, kao i sumnju da će se četiri poslanika koja nisu dostavila potvrdu obespraviti, pa smatra da iz navedenih razloga treba pričekati s usvajanjem odluke.

U vezi s diskusijom Ruže Sopte, Davorka Čaplinski dala je pojašnjenje člana 8. Prijedloga odluke.

Aljoša Čampara naglasio je da je situacija s delegatima u Domu naroda znatno teža, posebno kad se radi o ljudima koji po sili zakona treba da idu u penziju, te bi, po njegovom mišljenju, jedino kompromisno rješenje bila izmjena postojeće Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.6.2006., u smislu da svaki poslanik i delegat ostvaruje pravo na naknadu u trajanju od 12 mjeseci po prestanku mandata, nezavisno od umirenja radnog odnosa ili statusa penzionera.

Senija Kapetanović replicirala je i istakla da nije uredu da se postojeća odluka mijenja.

Mubera Ušanović upoznala je članove Komisije da se vraća na poziciju stručnog saradnika kod ranijeg poslodavca, ali da postoji mogućnost da joj radni staž ostane nepovezan, jer se shodno rješenju njene radne jedinice rok povratka na radno mjesto može prolongirati na 30 dana. U vezi s tim, Senija Kapetanović pozvala je sekretara Davorku Čaplinski da pojasni mogućnost rješenja problema s poslanicima koji su umirili radni odnos, kako ne bi dolazilo do prekida radnog staža.

Davorka Čaplinski istakla je da je jedno od mogućih rješenja ovog problema to da ovim poslanicima radni odnos u Parlamentarnoj skupštini BiH prestane s danom donošenja rješenja o aktiviranju prijašnjeg radnog odnosa.

Vinko Zorić zatražio je da se donese zaključak da četiri poslanika, koji nisu dostavili nikakav dokaz o svom radnopravnom statusu, rješenja o prestanku radnog odnosa u Parlamentarnoj skupštini BiH dobiju prije konstituirajuće sjednice novog mandata, kako bi mogli na vrijeme reagirati u skladu s članom 8. Prijedloga odluke.

Hazim Felić predložio je da se u članu 4. Prijedloga odluke doda rok od 30 dana za reguliranje radnopravnog statusa s ranijim poslodavcem.

Mlade Potočnik rekao je da je sramota čuti da bi se ljudi mogli naći na ulici, istaknuvši da je dužnost poslanika časna i sve što ide u prilog poslaniku treba primijeniti u konkretnom slučaju.

Vinko Zorić naglasio je da ga čudi da četiri poslanika navedena u Prijedlogu odluke nisu reagirala na poziv da dostave traženu dokumentaciju.

Jozo Križanović ponovo je naglasio da nema potrebe da se usvaja predložena odluka, već da se donose pojedinačni akti po pojedinačnim zahtjevima, a da se prava poslanika izvode iz akata koji su na snazi u Parlamentarnoj skupštini BiH.

Vinko Zorić podržao je inicijativu Joze Križanovića da se na 41. sjednici ne usvaja Prijedlog odluke, te je istovremeno predložio da članovi Komisije donesu zaključak da se izradi 19 rješenja za 19 poslanika koji su dostavili dokaz da se ne mogu vratiti na prethodno radno mjesto, čime su ostvarili pravo na naknadu.

Davorka Čaplinski upoznala je prisutne da je iz Sekretarijata Parlamentarne skupštine BiH upućen dopis Centralnoj izbornoj komisiji BiH, kojim je zatraženo da se izjasne kada poslanicima prestaje mandat, na što Centralna izborna komisija BiH nije odgovorila. Kolegij Sekretarijata Parlamentarne skupštine BiH je potom odlučio da se rješenje pitanja momenta prestanka mandata poslanicima nađe u Poslovniku Predstavničkog doma Parlamentarne skupštine Bosne i Hercegovine ("Sl. glasnik BiH", br. 20/00), te da se pristupi izradi odluke kojom će se obuhvatiti svi mogući slučajevi rješavanja statusa poslanika po prestanku mandata, a na osnovu koje će stručne službe Sekretarijata Parlamentarne skupštine BiH izraditi pojedinačna rješenja. Odluka je samo početni akt za izradu pojedinačnih rješenja kojom je u članu 8. predviđen način na koji i poslanici koji nisu dostavili potvrdu o svom radnom statusu mogu ostvariti pravo na naknadu.

Hazim Felić rekao je da je potrebno izvršiti određene korekcije u Prijedlogu odluke, koja je uslov za izdavanje pojedinačnih rješenja, i to: dati rok od 30 dana kao period u kojem se može izvršiti uvezivanje radnog staža, te izbaciti iz Prijedloga odluke izraz "tehnički mandat".

Mladen Potočnik podržao je prijedlog Hazima Felića i predložio da se za njega glasa.

Jozo Križanović rekao je da je on protiv glasanja o Prijedlogu odluke jer misli da će se Administrativna komisija ponovo vraćati na pitanje statusa poslanika po isteku mandata.

Ruža Sopta zatražila je da se u odluku unesu riječi "u skladu s postojećim pravnim propisima" za poslanike koji su umirili radni odnos, te da se iz odluke briše termin tehnički mandat, što su prisutni jednoglasno prihvatili.

Nakon rasprave predsjedavajuća Senija Kapetanović dala je Prijedlog odluke sa usvojenim izmjenama na glasanje.

Prisutni članovi Komisije su, sa 8 glasova ZA i jednim PROTIV, donijeli

ODLUKU

o naknadi plaće po prestanku mandata poslanicima koji ostvaruju prava iz radnog odnosa u Parlamentarnoj skupštini Bosne i Hercegovine

Član 1.

U skladu s tačkom XXV. Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.06.2006. godine, članom 1. Odluke Administrativne komisije Predstavničkog doma Parlamentarne skupštine Bosne i Hercegovine o izmjenama i dopunama Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.06.2006. godine, broj: 01/7-50-1-7-3-40/06, od 18.9.2006. godine, i članom 1. Odluke Komisije za finansijske i administrativne poslove Doma naroda Parlamentarne skupštine Bosne i Hercegovine o izmjenama i dopunama Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.06.2006. godine, broj: 02/3-50-1-14-5-44/06, od 15.09.2006., poslanici:

1.	Vlatka Komšić
2.	Miloš Jovanović
3.	Senija Kapetanović
4.	Adem Huskić
5.	Mladen Potočnik
6.	Ljiljana Milićević
7.	Muhamed Moranjkić
8.	Mirsad Ćeman
9.	Mehmed Žilić
10.	Hazim Felić
11.	Izet Hadžić
12.	Marija Perkanović
13.	Dušanka Majkić

14.	Ruža Sopta
15.	Elmir Jahić
16.	Ibrahim Đedović
17.	Tihomir Gligorić
18.	Ivo Lozančić
19.	Nenad Mišić
20.	Nadžida Mlaćo

dali su valjane dokaze da se ne mogu vratiti na posao kod ranijeg poslodavca, čime su stekli pravo na naknadu plaće za 12 mjeseci od dana prestanka mandata i to po koeficijentu za obračun plaće koji su poslanici u momentu isteka mandata ostvarivali, bez prava na povećanje koeficijenta, ukoliko do njega dođe.

Član 2.

U skladu sa čl. 2. i 3. Poslovnika Predstavničkog doma Parlamentarne skupštine Bosne i Hercegovine, poslanici stiču pravo iz člana 1. ove odluke danom održavanja konstituirajuće sjednice novog mandata Predstavničkog doma Parlamentarne skupštine Bosne i Hercegovine.

U skladu sa stavom 1. ovog člana, poslanici se nalaze u stalnom radnom profesionalnom odnosu u Parlamentarnoj skupštini Bosne i Hercegovine do održavanja konstituirajuće sjednice novog mandata Predstavničkog doma Parlamentarne skupštine Bosne i Hercegovine.

Odredbe člana 7. Poslovnika Predstavničkog doma Parlamentarne skupštine Bosne i Hercegovine primjenjuju se u skladu sa stavom 2. ovog člana.

Član 3.

Poslanicima koji zasnuju radni odnos kod drugog poslodavca u vrijeme dok koriste pravo iz člana 1. ove odluke prestaje pravo na naknadu plaće danom zasnivanja radnog odnosa.

Član 4.

Pravo iz člana 1. ove odluke ne ostvaruje poslanik:

1.	Muhamed Altić
----	---------------

koji ima status penzionera, odnosno poslanici:

1.	Jelina Đurković
2.	Petar Kunić
3.	Mubera Ušanović
4.	Nijaz Duraković

koji su umirili radni odnos.

U skladu sa čl. 2. i 3. Poslovnika Predstavničkog doma Parlamentarne skupštine Bosne i Hercegovine, poslanici iz stava 1. ovog člana nalaze se u stalnom radnom profesionalnom odnosu u Parlamentarnoj skupštini Bosne i Hercegovine do održavanja konstituirajuće sjednice novog mandata Predstavničkog doma Parlamentarne skupštine Bosne i Hercegovine.

Odredbe člana 7. Poslovnika Predstavničkog doma Parlamentarne skupštine Bosne i Hercegovine primjenjuju se u skladu sa stavom 2. ovog člana.

Član 5.

Poslanicima koji su umirili radni odnos kod poslodavca prestaju sva prava po osnovu radnog odnosa u Parlamentarnoj skupštini Bosne i Hercegovine u skladu s važećim zakonskim propisima.

Član 6.

Pravo iz člana 1. ove odluke ostvaruju i poslanici koji stiču uslove za odlazak u penziju po sili zakona.

Pravo utvrđeno stavom 1. ovog člana poslanici mogu koristiti do dana kad su se stekli zakonski uslovi za odlazak u penziju po sili zakona.

Član 7.

U skladu s odredbama ove odluke smatrat će se da se mogu vratiti na posao kod ranijeg poslodavca, odnosno da su zasnovali radni odnos kod drugog poslodavca poslanici:

1.	Filip Andrić
2.	dr.Sead Avdić
3.	Mirko Blagojević

koji nisu u skladu s tačkom XXV. Odluke o načinu obračuna plaća i ostalih materijalnih prava poslanika i delegata u Parlamentarnoj skupštini Bosne i Hercegovine (prečišćeni tekst), broj: 01/7,02/3-50-1-17-3-19/06, od 21.6.2006. godine, i na poziv Zajedničke službe Sekretarijata Parlamentarne skupštine Bosne i Hercegovine, 03-34-1-819/06, od 31.8.2006. godine, dostavili dokaz da se ne mogu vratiti na posao kod ranijeg poslodavca.

Poslanicima iz stava 1. ovog člana prestaje stalni profesionalni radni odnos u Parlamentarnoj skupštini Bosne i Hercegovine danom održavanja konstituirajuće sjednice novog mandata Predstavničkog doma Parlamentarne skupštine Bosne i Hercegovine bez prava na naknadu utvrđenu članom 1. ove odluke.

Odredbe člana 7. Poslovnika Predstavničkog doma Parlamentarne skupštine Bosne i Hercegovine primjenjuju se i na ove poslanike dok su u stalnom radnom profesionalnom odnosu u Parlamentarnoj skupštini Bosne i Hercegovine.

Član 8.

Izuzetno od odredbi člana 7. ove odluke poslanici koji naknadno Sekretarijatu Parlamentarne skupštine Bosne i Hercegovine dostave dokaz da se ne mogu vratiti na posao kod ranijeg poslodavca, odnosno da nisu zasnovali radni odnos kod drugog poslodavca steći će pravo utvrđeno članom 1. ove odluke danom podnošenja zahtjeva.

Dužina trajanja prava na naknadu neće biti produžena od dana podnošenja zahtjeva već se u dužinu trajanja prava na naknadu uračunati period za koji nisu koristili pravo utvrđeno članom 1. ove odluke.

Član 9.

Poslanici, koji su zasnovali stalni profesionalni radni odnos u Parlamentarnoj skupštini Bosne i Hercegovine, a kojima je Centralna izborna komisija Bosne i Hercegovine verificirala mandat na izborima 2006. godine, i to:

1. ŠEFIK DŽAFEROVIĆ
2. BERIZ BELKIĆ
3. MEHMED SULJKANOVIĆ
4. SELIM BEŠLAGIĆ
5. JOZO KRIŽANOVIĆ
6. MARTIN RAGUŽ
7. VINKO ZORIĆ
8. NIKOLA ŠPIRIĆ
9. MILORAD ŽIVKOVIĆ
10. MOMČILO NOVAKOVIĆ

ostvaruju pravo na stalni radni profesionalni odnos u Parlamentarnoj skupštini Bosne i Hercegovine u skladu s aktima Parlamentarne skupštine Bosne i Hercegovine.

Član 10.

Zadužuje se Sektor za opće poslove Sekretarijata Parlamentarne skupštine Bosne i Hercegovine da, na osnovu ove odluke, izradi rješenja poslanicima i dostavi ih predsjedavajućoj Administrativne komisije Predstavničkog doma Parlamentarne skupštine Bosne i Hercegovine na potpis.

Za realizaciju ove odluke zadužuje se Sekretarijat Parlamentarne skupštine Bosne i Hercegovine.

Član 11.

Odluka stupa na snagu danom donošenja.

Nakon usvajanja prijedloga odluke, Senija Kapetanović upoznala je članove Komisije sa zahtjevom poslanika Fatime Leho kojim traži da joj se odobri produženje radnog odnosa u Parlamentarnoj skupštini BiH do 10.1.2007., kada stiče uslov za punu penziju.

Prisutni članovi Komisije su, sa 7 glasova ZA i 2 SUZDRŽANA, usvojili

ODLUKU

Poslanik Fatima Leho je u stalnom radnom profesionalnom odnosu u Parlamentarnoj skupštini Bosne i Hercegovine do održavanja konstituirajuće sjednice novog mandata Predstavničkog doma Parlamentarne skupštine Bosne i Hercegovine.

Poslaniku Fatimi Leho odobrava se pravo na naknadu plaće počev od dana prestanka mandata do 10.1.2007. zaključno, i to po koeficijentu za obračun plaće koji je poslanik u momentu isteka mandata ostvarivao, bez prava na povećanje koeficijenta, ukoliko do njega dođe.

U skladu s čl. 2. i 3. Poslovnika Predstavničkog doma Parlamentarne skupštine Bosne i Hercegovine, poslanik Fatima Leho stiče pravo na naknadu plaće danom održavanja konstituirajuće sjednice novog mandata Predstavničkog doma Parlamentarne skupštine Bosne i Hercegovine.

Sektor za opće poslove Sekretarijata Parlamentarne skupštine Bosne i Hercegovine će na osnovu ove odluke izraditi rješenja o prestanku radnog odnosa i prava na naknadu plaće poslaniku Fatimi Leho s danom 10.1.2007.

Odluka stupa na snagu danom donošenja.

Nakon usvajanja Odluke za Fatimu Leho, Davorka Čaplinski naglasila je da se Fatima Leho briše iz usvojenog Prijedloga odluke, s obzirom da će se za imenovanu izraditi pojedinačna odluka.

U vezi s tim, Ruža Sopta dodala je da, ako neko od četiri poslanika koji nisu dostavili dokaz o svom radnom statusu, taj dokaz u međuvremenu dostavi, da se i on uvrsti među poslanike koji su stekli pravo na naknadu po prestanku mandata, što su prisutni i prihvatili.

AD-5 Senija Kapetanović prezentirala je članovima Komisije prijedlog Kolegija Sekretarijata Parlamentarne skupštine BiH da se državnom službeniku Dragici Hinić odobri naknada od 20% na osnovnu plaću za privremeno obavljanje poslova sekretara Komisije za finansije i budžet u Predstavničkom domu Parlamentarne skupštine BiH.

U diskusiji o ovoj tački dnevnog reda Dušanka Majkić rekla je da je Dragica Hinić vodila dvije komisije i da je rečeno da treba da se opredijeli za jednu što je ona i učinila. Konstatirala je da je sad nastala ista situacija, s obzirom da se predlaže da vodi dvije komisije. U vezi s tim pitala je da li postoji mogućnost trajnog rješavanja problema vezanog za nedovoljan broj sekretara, kako bi se komisijama omogućilo da mogu kvalitetno raditi.

Aljoša Čampara informirao je prisutne da su raspisani konkursi za popunu radnih mjesta sekretara komisija, ali da Agencija za državnu službu BiH kasni u provođenju zakonskih aktivnosti tako da je narušena i dinamika zapošljavanja u Sekretarijatu Parlamentarne skupštine BiH, pa je jedini mogući način za prevazilaženje trenutnog stanja imenovanje privremenih sekretara.

Dušanka Majkić istakla je da bi, ako Agencija za državnu službu BiH ugrožava vitalne interese Parlamentarne skupštine BiH, trebalo preduzeti određene mjere.

Nakon što je rasprava o ovom pitanju završena, predsjedavajuća je dala na glasanje Prijedlog odluke.

Prisutni su, sa 8 glasova ZA i jednim SUZDRŽANIM, donijeli

ODLUKU

o utvrđivanju visine naknade za privremeno obavljanje poslova sekretara komisije

I.

Državnom službeniku Dragici Hinić za privremeno obavljanje poslova sekretara Komisije za finansije i budžet Predstavničkog doma Parlamentarne skupštine Bosne i Hercegovine utvrđuje se naknada na osnovnu plaću u visini od 20%.

II.

Za realizaciju ove odluke zadužuju se Kolegij Sekretarijata Parlamentarne skupštine Bosne i Hercegovine.

III.

Odluka stupa na snagu danom donošenja, a primjenjivat će se od 1.10.2006.

AD-6 Senija Kapetanović dala je uvodne napomene o ovoj tački dnevnog reda, nakon čega je pozvala sekretara da ukratko obrazloži Nacrt izvještaja o radu Administrativne komisije za mandatni period 2002.-2006.

Davorka Čaplinski naglasila je da Izvještaj nije konačan i da su se u njegovoj izradi slijedile upute OSCE-a. Istakla je da u Izvještaju nisu obrađena pitanja ocjene rada Sekretarijata Parlamentarne skupštine BiH i stručnih službi u Sekretarijatu Parlamentarne skupštine BiH, te pitanje ocjene saradnje s Vijećem ministara BiH, tako da bi članovi Komisije na današnjoj sjednici trebalo da daju svoje mišljenje u vezi s navedenim pitanjima OSCE-a koja su im dostavljena uz Izvještaj.

Duška Majkić je u svojoj diskusiji istakla da je Nacrt izvještaja dobra osnova za izradu konačnog izvještaja te da je način koji je OSCE predložio za izradu Izvještaja dobra osnova za uspostavljanje standarda primopredaje dužnosti između starog i novog saziva Administrativne komisije. Rekla je da se najvažniji dio parlamentarnog rada odvija u komisijama i zato njihov uspješan rad zavisi od kvalitetne pripreme sjednica, što podrazumijeva i kvalitetnu pripremu odluka koje komisije donose. Naglasila je da je nezadovoljna pripremama članova komisije za sjednice komisije, kao i kvalitetom odluka koje se donose. Konstatirala je da rad ove komisije počiva na radu sekretara Administrativne komisije, pa smatra da dio poslova treba prenijeti sa sekretara na članove Kolegija Administrativne komisije. Želi da primopredaja dužnosti između starog i novog mandata Administrativne komisije postane ubuduće pravilo.

Nakon ovog izlaganja Duška Majkić predložila je mjere za kvalitetniji rad Komisije.

Jozo Križanović podržao je pokušaj stvaranja prakse da se nakon završetka mandata ostavlja trag o radu Komisije u toku proteklog mandatnog perioda.

Senija Kapetanović istakla je da se rad poslanika može poboljšati boljom i organiziranijom pomoći stručnih službi Sekretarijata Parlamentarne skupštine BiH poslanicima. Istovremeno je pozvala članove Komisije da daju svoju ocjenu rada Sekretarijata Parlamentarne skupštine BiH, te naglasila da Sekretarijat mora raditi na upoznavanju poslanika sa stručnim službama, njihovim radom i obavezama prema poslanicima u Parlamentarnoj skupštini BiH.

Nakon rasprave članovi Komisije prihvatili su primjedbe i sugestije Dušanke Majkić:

Primjena odredbi koje reguliraju rad komisija

Poznato je da se najvažniji dio parlamentarnih aktivnosti odvija u parlamentarnim komisijama. Zato ovaj veoma važan segment parlamentarnog rada treba regulirati poslovniciama domova na način koji će osigurati kvalitetniji rad i njihovu efikasnost u obavljanju povjerenih im aktivnosti, a što će se svakako odraziti i na kvalitet rada Parlamentarne skupštine BiH.

U poslovniciama bi trebalo da postoje odredbe koje obavezuju sve komisije u domovima na donošenje poslovnika o radu. Tako bi bile stvorene pretpostavke za jednoobrazan način rada komisija te za jasnije sagledavanje razgraničenja ovlaštenja između predsjedavajućeg komisije, Kolegija i sekretara komisije.

Poslovničke odredbe u ovom dijelu organizacije rada komisija ne daju mogućnost da se neki tehnički poslovi povjere sekretaru već traže dodatni angažman predsjedavajućeg (kao npr. potpisivanje dopisa kojima se dostavljaju akti komisije, traženje podataka za potrebe komisije i sl.)

što se često odražava na efikasnost rada – nepotrebno se čeka potpis predsjedavajućeg ili se šalje zvaničan dopis sa s.r.

Nadalje, poslovničke odredbe kojima se regulira organizacija rada komisije nisu dovoljne jer nema odredbe koja bi davala mogućnost predsjedavajućem komisije da u pripremi važnih tačaka dnevnog reda zaduži i traži od članova kolegija njihov angažman.

Nedovoljne su poslovničke odredbe koje obavezuju komisije na podnošenje izvještaja jednom godišnje, a u slučaju Zajedničke komisije za administrativne poslove napravio se previd da ona po poslovnicima prati izvršenje budžeta, pa je iz tih razloga trebalo ostaviti odredbu da ova komisija dva puta godišnje podnosi domovima izvještaj-po šestomjesečnom usvajanju izvještaja o izvršenju budžeta i na kraju godine.

Poslovníkom nisu uređena pitanja praćenja rada komisija, kao ni standardi po kojima će se ocjenjivati rad i postignuti rezultati. Standarde je potrebno definirati poslovnícima a komisije treba da ih ispune – što znači da će se izvještaji komisija o radu za proteklu godinu razmatrati na sjednicama domova, u skladu s propisanim standardima.

Dakle, na dogradnji poslovníka domova treba raditi i što prije ugraditi odredbe koje bi:

1. Definirale standarde i procedure za rad svih parlamentarnih komisija.

Treba precizirati standard rada komisije (pisana norma) na osnovu kojeg se:

- procjenjuje kvalitet rada svih poslanika u komisijama;
- ocjenjuje rad svakog člana komisije,
- ocjenjuje kvalitet rada predsjedavajućeg komisije, prvog i drugog zamjenika predsjedavajućeg komisije, te sekretara komisije,
- ocjenjuje doprinos svakog člana komisije njenom radu,
- prati napredak u dostizanju standarda u radu komisije (preciziranje određenog broja sjednica komisije u godini i po kvartalima na kojima će se razmatrati njihovi operativni planovi i izvršenje planiranih aktivnosti);

2. Precizirale i nadogradile postojeće odredbe u poslovnícima domova kojima se regulira rad komisija, a koje su nejasne i nedovoljno precizne.

3. Regulirale neophodne podatke koje godišnji izvještaji komisija moraju sadržavati čime bi se postigla jednoobraznost u izradi izvještaja i stvorila baza podataka na osnovu kojih se mogu vršiti analize efikasnosti rada (kalendar sjednica za proteklu godinu, doprinos svakog člana komisije izražen kroz njegov procenat učešća u radu komisije, i sl.).

4. Nametale obaveznu izradu plana aktivnosti komisije za narednu godinu kao i rok do kojeg treba da budu izrađeni planovi komisija, kome se dostavljaju, te ko ih razmatra i dr.

Polazeći od činjenice da uspješan i efikasan rad komisija podrazumijeva:

1. kvalitetnu pripremu članova komisije,
2. dobro vođenje sjednica,
3. kvalitetne odluke, i
4. godišnju ocjenu rada komisije.

a ovim zahtjevima moguće je udovoljiti ako postoje utvrđeni standardi kojih se komisije u svom radu moraju pridržavati. Dakle, u tom pravcu potrebno je vršiti izmjene i dopune poslovníka domova.

Rad Administrativne komisije Predstavničkog doma Parlamentarne skupštine BiH, **posmatran u skladu s navedenim standardima, sigurno zahtijeva poboljšanje u svim segmentima.** Težina rada u ovoj komisiji nije bila ravnomjerno raspoređena u proteklom periodu, odnosno veći dio tereta nosio je sekretar Administrativne komisije, s obzirom da nije postojala ravnomjerna podjela aktivnosti između

predsjedavajućeg i članova Kolegija Administrativne komisije koja bi svakako doprinijela prenošenju određenih aktivnosti sa sekretara Komisije na njeno rukovodstvo. Ovakvo stanje posljedica je poslovnčkih odredbi koje nedovoljno govore o organizaciji rada komisija.

*
* *

Administrativna komisija Predstavničkog doma Parlamentarne skupštine BiH smatra da je za uspješan rad komisija potrebno na početku svakog mandata **organizirati seminar za svaku parlamentarnu komisiju** na kojem će se članovi komisije upoznati s načinom rada, nadležnostima i njenim obavezama utvrđenim poslovnicama domova. Seminar bi trebalo da posluži u svrhu organiziranja kvalitetnijeg rada komisija i izvršavanja poslova iz njihovog djelokruga.

Na seminaru treba prezentirati:

- **način na koji rade slična tijela u parlamentima zemalja u okruženju;**
- **iskustva drugih zemalja u tranziciji u organizaciji rada parlamentarnih tijela,**
- **iskustva iz navedene oblasti zemalja s razvijenom demokratijom.**

*
* *

Administrativna komisija smatra da je **potrebno izraditi strategiju PR** (public relations = komunikacija s javnošću) i učiniti da kontakti s javnošću budu afirmativni, osmišljeni, međusobno usaglašeni.

Prilikom izrade strategije komunikacija s javnošću potrebno je:

- a) **Razviti kvalitetnu internu komunikaciju – INTERNI PR** (između parlamentarnih komisija u vidu obavještenja o radu i na način koji garantira internu informiranost – intranet, novine, bilten i sl.).
- b) **Redovno ažurirati web stranice i nakon svake sjednice redovno upoznavati medije s odlukama komisije (povećanje transparentnosti).**
- c) **Razviti kvalitetan EKSTERNI PR** koji podrazumijeva odnose:
 - **s institucijama na različitim nivoima u BiH** (državni, entitetski, kantonalni),
 - **između zakonodavne, izvršne i sudske vlasti na svim nivoima**, kao i
 - **razvijenu komunikaciju s građanima i medijima.**

*
* *

Da bi se u narednom mandatnom periodu unaprijedio komisijski rad, a time i rad oba doma Parlamentarne skupštine BiH, potrebno je poslovnicama predvidjeti **osnivanje stalne (zajedničke) komisije za unapređenje rada Parlamentarne skupštine BiH i njenih tijela.**

OPĆI OSVRT NA STRUČNU POMOĆ SLUŽBI SEKRETARIJATA PARLAMENTARNE SKUPŠTINE BOSNE I HERCEGOVINE

a) Pravna pomoć

U dosadašnjem radu Administrativna komisija **nije dobivala adekvatnu pravnu pomoć stručnih službi Sekretarijata Parlamentarne skupštine BiH**. S obzirom na specifičnost ove komisije i njene nadležnosti moglo se očekivati da će stručne službe materijal, prije slanja na Komisiju, pravno obraditi i dati sve relevantne činjenice za kvalitetno odlučivanje s prijedlogom rješenja određenog problema. U proteklom periodu uglavnom se rješavanje problema u potpunosti prebacivalo sa stručnih službi na Administrativnu komisiju tako da se ona bavila nekim problemima i duže nego što je to stvarno bilo potrebno.

Učešće u radu Administrativne komisije članova Kolegija Sekretarijata

S obzirom na akte koje donosi Administrativna komisija i činjenicu da su oni u uskoj vezi s radom Sekretarijata Parlamentarne skupštine BiH, **u narednom periodu potrebno je poboljšati komunikaciju između Komisije i Kolegija Sekretarijata**. Sjednicima Komisije na kojima se odlučuje o pitanjima iz djelokruga Sekretarijata ili donose važni akti kojima se reguliraju prava zaposlenih u Parlamentarnoj skupštini BiH obavezno bi trebalo da prisustvuju svi članovi Kolegija Sekretarijata.

U raspravama Komisije o značajnim pitanjima koja su se odnosila na akte Predstavničkog doma Parlamentarne skupštine BiH i na osnovu kojih je Komisija trebalo da donese odluke nije bio uključen sekretar Doma, što se ne bi trebalo ponoviti u narednom mandatnom periodu. **Kad Komisija odlučuje o pitanjima koja su proizašla iz akata Predstavničkog doma Parlamentarne skupštine BiH, sekretar Doma treba prisustvovati sjednicama Komisije.**

Pomoć Istraživačkog centra Parlamentarne skupštine BiH u radu Administrativne komisije

Za potrebe Administrativne komisije Istraživački centar Parlamentarne skupštine BiH je stručno i kvalitetno radio analizu zakonodavnih rješenja koja su se ticala aktuelnih tema u radu Komisije. Međutim, zbog malog kapaciteta Istraživačkog centra, stručna pomoć u pojedinačnim zahtjevima poslanika kojima su tražene određene analize rješenja u drugim državama u oblasti za koju je zainteresiran poslanik, bila je nedovoljna i neblagovremena. Iz navedenih razloga potrebno je raditi na kadrovskom osposobljavanju i organizacionom unapređenju rada Istraživačkog centra Parlamentarne skupštine BiH.

Međunarodna pomoć

U proteklom mandatnom periodu izostala je međunarodna pomoć Administrativnoj komisiji. Jedini oblik nekog vida kontakata s međunarodnim organizacijama u Bosni i Hercegovini je praćenje rada ove komisije kroz projekat OSCE-a.

S obzirom na značaj administrativnih komisija domova i rukovođenja Parlamentarnom skupštinom BiH, u narednom periodu trebalo bi omogućiti Komisiji uvid u rad sličnih komisija u zemljama u tranziciji, kao i razvijenim zemljama.

S obzirom da nema komunikacije Administrativne komisije s drugim parlamentima niti ona učestvuje u međunarodnoj parlamentarnoj saradnji s drugim parlamentima, sigurno je da nije ni mogla peuzeti dobre primjere iz prakse drugih parlamenata.

Imajući u vidu navedeno, u narednom periodu potrebno je ostvariti kontakte sa zemljama iz okruženja i stvoriti dobre uslove za regionalnu saradnju u budućnosti s parlamentarnim komisijama

koje imaju iste ili slične nadležnosti u parlamentima u okruženju. Kao početak aktivnosti na tom polju trebalo bi organizirati posjete:

- Sloveniji kao članici EU,
- Hrvatskoj, kao zemlji koja je pred učlanjenjem u EU, te
- Srbiji.

Iskustva ovih zemalja mogla bi poslužiti u boljoj organizaciji rada Komisije. Razmjena iskustava u organizaciji rada i rukovođenju parlamentom doprinijela bi efikasnijem radu i unapređenju rada Komisije."

Primjedbe su sastavni dio Izvještaja o radu Administrativne komisije za mandatni period 2002.-2006. i treba da budu unesene u konačan tekst Izvještaja.

Članovi Komisije jednoglasno su donijeli

ZAKLJUČAK

Usvaja se Izvještaj o radu Administrativne komisije za mandatni period 2002.-2006. sa usvojenim dopunama.

AD-7 Senija Kapetanović dala je uvodne napomene o ovoj tački dnevnog reda. Rasprave o ovoj tački nije bilo.

Prisutni su primili k znanju informaciju o odlukama Visokog sudskog i tužilačkog vijeća BiH, broj: VSTV-08-1144-21092006, od 21.9.2006., i VSTV-08-1155-25092006, od 25.9.2006.

AD-8 a) Informacija o Tumačenju Tačke IV. Odluke o utvrđivanju naknade za rad u Ad hoc komisiji za izbor i imenovanje, broj: 01/7-50-1-52-4-32/05, od 21.12.2005.

Senija Kapetanović pozvala je sekretara Administrativne komisije da obrazloži ovu tačku dnevnog reda. U obrazloženju Davorka Čaplinski istakla je da je Vinko Zorić predsjedavao sjednicom Administrativne komisije na kojoj je usvojeno Tumačenje Tačke IV. Odluke o utvrđivanju naknade za rad u Ad hoc komisiji za izbor i imenovanje, ali je odbio potpisati. Također je podsjetila prisutne i na zaključak Administrativne komisije, prema kojem sve odluke koje se na Administrativnoj komisiji donesu većinom glasova mora potpisati predsjedavajući sjednicom, bez obzira na njegov lični stav prema odluci.

Vinko Zorić pojasnio je da je odbio potpisati Tumačenje jer se nije slagao s njegovim sadržajem, te je naglasio da će ipak potpisati navedeno Tumačenje, što je i učinio u toku sjednice.

U okviru ove tačke dnevnog reda prisutni su jednoglasno donijeli

ZAKLJUČAK

Kad Predstavnički dom Parlamentarne skupštine Bosne i Hercegovine osnuje komisiju ili kad u skladu sa zakonom obaveže Ad hoc komisiju za izbor i imenovanje da obavi zakonom propisane obaveze, jedan primjerak odluke Predstavničkog doma Parlamentarne skupštine Bosne i Hercegovine potrebno je dostaviti i Odjelu za računovodstvo i finansije.

b) Informacija o potvrđivanju na domovima Pravilnika o međunarodnim aktivnostima Parlamentarne skupštine Bosne i Hercegovine, broj: 01/7,02/3-50-1-17-4-20/06, od 26.7.2006.

Uvodno izlaganje o ovoj tački dnevnog reda dala je Senija Kapetanović i pozvala sekretara Administrativne komisije da ukratko obrazloži ovu tačku dnevnog reda.

Davorka Čaplinski je prisutnima kratko obrazložila materijal koji je dostavljen u prilogu ove tačke.

Senija Kapetanović naglasila je da uz materijal dostavljen i prijedlog zaključka o kojem bi prisutni trebalo da se izjasne.

Momčilo Novaković u raspravi o ovoj tački dnevnog reda rekao je da nije siguran da stoje sve činjenice koje je u obrazloženju dao sekretar, s obzirom da je činjenica da navedene komisije imaju međunarodne aktivnosti posebno što pred njima stoje veoma ozbiljni zadaci. Smatra da je Dom naroda trebalo da usvoji Pravilnik o međunarodnim aktivnostima Parlamentarne skupštine Bosne i Hercegovine u različitom tekstu u odnosu na tekst koji je usvojen na Predstavničkom domu, te da je potom trebalo slijediti ustaljenu poslovničku proceduru, tj. ići na usaglašavanje teksta Pravilnika.

Nakon rasprave prisutni su jednoglasno donijeli

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine smatra da je, u skladu s poslovničkom procedurom, Dom naroda Parlamentarne skupštine Bosne i Hercegovine trebalo da se izjasni o predloženom tekstu Pravilnika o međunarodnim aktivnostima Parlamentarne skupštine Bosne i Hercegovine, broj: 01/7,02/3-50-1-17-4-20/06, od 26.7.2006., i usvoji primjedbe iznesene na 62. sjednici, održanoj 7.9.2006., na osnovu čega bi se u skladu s poslovnicima domova išlo na usklađivanje konačnog teksta navedenog akta.

Na osnovu navedenog, Administrativna komisija Predstavničkog doma Parlamentarne skupštine Bosne i Hercegovine sugerira da se u vezi s potvrđivanjem Pravilnika o međunarodnim aktivnostima Parlamentarne skupštine Bosne i Hercegovine, broj: 01/7,02/3-50-1-17-4-20/06, od 26.7.2006., ispoštuje poslovnička procedura.

c) Verifikacija prečišćenog teksta Pravilnika o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, broj: 01/7,02-/03-50-1-188-6-9/05, od 25.5.2006.

Uvodno izlaganje o ovoj tački dnevnog reda dala je Senija Kapetanović. Rasprave o ovoj tački dnevnog reda nije bilo.

Prije nego što se glasalo o verifikaciji prečišćenog teksta Pravilnika o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, broj: 01/7,02-/03-50-1-188-6-9/05, od 25.5.2006., Jozo Križanović zatražio je da se u članu 46. Pravilnika u četvrtom redu dodaju riječi "a koji ne koriste pravo na odvojeni život od porodice i smještaj", te da se prečišćeni tekst Pravilnika verifikira s ovom izmjenom. Prisutni su jednoglasno prihvatili prijedlog Joze Križanovića i donijeli

ODLUKU

o verifikaciji prečišćenog teksta Pravilnika o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, broj: 01/7,02-/03-50-1-188-6-9/05, od 25.5.2006.

I.

Verificira se prečišćeni tekst Pravilnika o načinu i uslovima korištenja internih i eksternih usluga – reprezentacije, PTT usluga, službenog vozila, službene odjeće, štampe i stručne literature u Parlamentarnoj skupštini Bosne i Hercegovine, broj: 01/7,02-/03-50-1-188-6-9/05, od 25.5.2006., s tim da se u članu 46. navedenog Pravilnika u četvrtom redu iza riječi "rada" dodaje zarez i tekst: "a ne koriste pravo na odvojeni život od porodice i smještaj".

II.

Odluka stupa na snagu danom donošenja.

Pošto je realiziran dnevni red, 41.sjednica Administrativne komisije Predstavničkog doma Parlamentarne skupštine BiH završena je u 13,20 sati.

Sekretar
Administrativne komisije
Davorka Čaplinski

Predsjedavajuća
Administrativne komisije
Senija Kapetanović